




BAB 13: LAMBAIAN KAABAH



Kepentingan Haji

Haji merupakan ibadat yang wajib ditunaikan oleh mereka yang berkemampuan sahaja. Pentingnya haji ini kepada individu dan masyarakat ialah sebagai lambang dan sebagai bukti pematuhan kita kepada rukun Islam yang kelima.



Sejarah Haji

Ibadat haji merupakan rukun Islam kelima. Dari segi sejarah, ibadah haji ialah syariat yang dibawa oleh junjungan Nabi kita Muhammad S.A.W. sebagai memperbaharui dan menyambung ajaran Nabi Allah Ibrahim A.S.. Ibadat haji mula diwajibkan ke atas umat Islam pada tahun ke-6 Hijrah, mengikut haul yang masyhur iaitu dengan turunnya ayat 97 surah Al-Imran yang bermaksud:

" Dan Allah Taala mewajibkan manusia mengerjakan ibadat haji dengan mengunjungi Baitullah iaitu sesiapa yang mampu dan berkuasa sampai kepada-Nya dan sesiapa yang kufur dan ingkar kewajipan haji itu, maka sesungguhnya Allah Maha Kaya dan tidak berhatkan sesuatu pun daripada sekalian makhluk".

Pada tahun tersebut, Rasulullah S.A.W. bersama-sama lebih kurang 1 500 orang telah berangkat ke Mekah untuk menunaikan fardu haji tetapi gagal mengerjakannya kerana telah dihalang oleh kaum Quraisy sehinggalah wujud satu perjanjian yang dinamakan Perjanjian Hudaibiah. Perjanjian itu membuka jalan bagi perkembangan Islam di mana pada tahun berikutnya (tahun ke-7 Hijrah), Rasulullah telah mengerjakan umrah bersama-sama 2 000 orang umat Islam. Pada tahun ke-9 Hijrah barulah ibadat haji dapat dikerjakan di mana Rasulullah mengarahkan Saidina Abu Bakar As-Siddiq mengetuai 300 orang umat Islam mengerjakan haji.

Falsafah Haji

1. Perhimpunan tahunan. Sebagai lambang perpaduan dan satu haluan umat Islam. Meraka bertemu bagi tujuan merapatkan hubungan dan bekerjasama dalam semua urusan harian.
2. Manusia adalah sama di sisi Allah dengan tidak mengira samada raja, hamba, serta kaya atau miskin. Allah hanya memandang kepada amalan dan ketakwaan.
3. Mempelajari pengorbanan sepertimana yang berlaku dalam sirah Nabi Allah Ibrahim dan anaknya, Nabi Allah Ismail.
4. Mempelajari dari latihan menjaga pantang larang dalam ihram sebagai contoh untuk dilaksanakan di dalam kehidupan seharian:
 - Buat perkara yang baik boleh mengundang berkat, buat perkara yang jahat boleh mengundang musibat.
 - Buat perkara yang baik boleh mendapat rahmat, buat perkara yang jahat boleh mendapat laknat.
 - Buat perkara yang baik boleh mendapat pahala, buat perkara yang jahat boleh mendapat dosa.
 - Buat kerja yang baik bermakna buat kerja halal, buat kerja jahat bermakna buat kerja yang haram.
 - Buat kerja yang baik adalah perbuatan maaruf, buat perkara yang jahat itu adalah perbuatan mungkar.
 - Buat perkara yang baik bermakna buat perbuatan yang terpuji, buat perkara yang jahat bermakna buat perbuatan yang tercela.
 - Buat perkara yang baik boleh menguntungkan, buat perkara yang jahat boleh merugikan.
 - Buat perkara yang baik mendapat balasan syurga, buat perkara yang jahat balasannya neraka.

Rasulullah S.A.W. Menunaikan Haji

Nabi kita Muhammad S.A.W telah menunaikan fardu haji sekali sahaja semasa hayatnya. Haji itu dinamakan "Hijjatul Wada'/ Hijjatul Balagh/ Hijjatul Islam atau Hijjatuttamam Wal Kamal” kerana selepas haji itu tidak berapa lama kemudian baginda pun wafat.

Rasulullah telah berangkat ke Madinatul Munawwarah pada hari Sabtu, 25 Zulkaedah tahun 10 Hijrah bersama isteri dan para sahabatnya seramai lebih 90 000 orang Islam. Rasulullah telah menyempurnakan amalan-amalan sunat ihram, memakai ihram, dan berniat ihram di Zulhulaifah, yang sekarang ini dikenal dengan nama Bir Ali, 10 km daripada Madinah dan Rasulullah sampai di Mekah pada 4 Zulhijah setelah mengambil masa 9 hari dalam perjalanan. Rasulullah berangkat ke Mina pada 8 Zulhijah dan bermalam di situ. Kemudian Rasulullah ke Arafah untuk berwukuf pada 9 Zulhijah yang jatuhnya pada hari Jumaat dan merayakan hari raya Aidiladha.

Rasulullah S.A.W. telah menyempurnakan semua rukun dan wajib haji hingga 13 Zulhijah dan pada 14 Zulhijah, Rasulullah S.A.W. telah berangkat meninggalkan Mekah Al-Mukarramah menuju balik ke Madinah Al-Munawwarah.

Peristiwa Ketika Hijjatul Wada'



* Wukuf di Arafah

Ketika wukuf, terdapat beberapa peristiwa penting yang boleh dijadikan pegangan dan panduan umat Islam . Antaranya termasuklah:

1. Rasulullah S.A.W. minum susu di atas unta supaya dilihat oleh orang ramai bahawa hari itu tiada puasa atau tidak sunat berpuasa pada hari wukuf.

2. Seorang sahabat terjatuh dari binatang tunggangannya lalu mati. Rasulullah S.A.W. menyuruh supaya mayat itu dikafankan dengan dua helai kain ihram dan tidak membenarkan kepalanya ditutup atau diwangikan jasad dan kafannya. Sabda baginda pada ketika itu bahawa: “Sahabat itu akan dibangkitkan pada hari kiamat dalam keadaan berhram dan bertalbiah”.
3. Rasulullah S.A.W. menjawab soalan seorang ahli Najdi yang bertanyakan: “Apakah itu haji?. Sabda baginda yang bermaksud: “Haji itu berhenti di Arafah. Siapa tiba di Arafah sebelum naik fajar 10 Zulhijah maka dia telah melaksanakan haji”.

4. Turunnya ayat suci Al-Quran dalam surah Al-Maidah yang bermaksud:

“Pada hari ini aku telah sempurnakan bagi kamu agama kamu dan aku telah cukupkan nikmatku ke atas kamu dan aku telah reda Islam itu menjadi agama untuk kami”.

Daripada sejarah dan peristiwa ringkas itu cubalah kita teliti betapa Rasulullah S.A.W. telah menyempurnakan haji dengan pengorbanan baginda bersama sahabat-sahabat yang berjalan dari Madinah Al-Munawwarah ke Mekah Al-Mukarramah selama 9 hari berbanding pada hari ini yang mana jemaah haji dari Malaysia boleh sampai ke Tanah Suci kurang daripada 9 jam dengan menaiki kapal terbang. Inilah perkara yang perlu kita renungkan apabila kita menghadapi sebarang kesusahan di Tanah Suci.

Hikmat dan Kelebihan Haji

1. Mendapat balasan syurga sebagaimana maksud hadis:

“Haji yang mabrur tidak ada balasan kecuali syurga”.

2. Diampunkan dosa dan doa dimakbulkan.
3. Memperoleh gandaan pahala.